

Headlines

1. प्रधानमंत्री नरेन्द्र मोदी होर कल नमीं दिल्ली च विकास-बाहे आहले केई सारे प्रोजेक्टें दा उद्घाटन करडन ते केइएँ दा नीहू पत्थर रक्खडन।
2. मुखमंत्री ओमर अब्दुल्ला होरें आखेआ ऐ जे ओहू मेद करदे न जे जम्मू-कश्मीर दा केन्द्र शासित प्रदेश दा दर्जा अस्थाई ऐ ते केन्द्र सरकार राज्य दा दर्जा तौले गै ब्हाल करोग।
3. औंदी 7 ते 8 जनवरी गी रेल सुरक्षा कमिशनर होर उधमपुर-श्रीनगर-बारामूला रेल लिंक परियोजना दे कटरा-रियासी सैक्शन दा खीरी निरीक्षण करडन। जम्मू गी रेलवे डिवीजन दा दर्जा थ्होग। प्रधानमंत्री मोदी होर औंदी 6 जनवरी गी नमीं दिल्ली थमां एहदा वर्चुअल ढंगै'नै उद्घाटन करडन।
4. राश्ट्री खेडू पुरस्कारें दा अज्ज ऐलान करी दित्ता गेआ ऐ।
5. मौसम विभाग नै 3 थमां 6 जनवरी तगर जम्मू दे मैदानी इलाकें च हौली थमां दरम्याने दर्जे दी बरखा बरने ते प्रदेश दिएं उच्चिएँ धारें पर बर्फबारी दे असार जताए न। उत्तर भारत च घनी धुंध ते कोहरे करी केई रेलगड्डियां अपने तय समें कोला चिरें चलै करदिआं न।

<><><><><><>

PM Delhi Projects

प्रधानमंत्री नरेन्द्र मोदी होर कल नमीं दिल्ली च कई नमीं विकास परियोजनाएं दी नीहू रक्खंगन ते उंदा उद्घाटन करंगन। ओहू तकरीबन 1700 नमें बने दे प्लैट जेजे जे.के.के. कलस्टर्स च बनाए गेदे न, उंदा उद्घाटन करंगन ते अशोक बिहार, दिल्ली च इंदे लाभार्थिएँ गी चाबियां बी सौपंगन। इनें प्लैटें दे उद्घाटन कन्नै दिल्ली विकास प्राद्यकरण दे झुगगी बस्ती पुनर्वास दी परियोजनां दा दुआ चरण सफलतापूर्वक पूरा होग। इस परियोजना दा मकसद जे.के.के. कलस्टर्स च रौहने आहले लोकें गी बेहतर ते स्वास्थ्यक वातावरण दे कन्नोकन्नी पूरी सुख-सुविधा देना हा। प्रधानमंत्री नरेन्द्र मोदी होर 2 शैहरी पुर्नविकास परियोजनां जिंदे च नोरोजी नगर च विश्व बपार केंद्र ते सरोजनी नगर च सामान्य पूल आवासीय आवास (GPRA) Type-II दे क्वार्टर शामिल न, उंदा बी उद्घाटन करंगन। मोर होर द्वारका च सी.बी.एस.ई दे इक दफ्तर कम्प्लैक्स दा बी उद्घाटन करंगन जेदे उप्पर तकरीबन 300 करोड़ रपे दा खर्चा आए दा ऐ।

CM Media Interaction

मुख्यमंत्री ओमर अब्दुल्ला होरें अज्ज एहू मेद जाह्न कीती ऐ जे जम्मू-कश्मीर दा केन्द्र शासित प्रदेश दा दर्जा अस्थाई दौर ऐ ते केन्द्र सरकार राज्य दा दर्जा तौले बहाल करने दे अपने वायदे गी पूरा करोग। ओमर होरें एहू गल्ल अज्ज घाटी दे शेर कश्मीर अंतराष्ट्री कन्वेंशन सेंटर-एसकेआईसीसी च मीडिया कर्मिण कन्नै गल्लबात करदे होई आखी।

ओमर होरें अपनी सरकार अगो दरपेश बक्ख-बक्ख मामलें बारै सोआलें दे जोआब दित्ते जिंदे च जनता आसेआ चुनी गेदी सरकार दे कम्मकाज मतल्लक सोआल बी शामिल हे, जिसी केन्द्र आसेआ नियुक्त उपराज्यपाल हुंदे कन्नै अख्तियार सांझे करने पवै करदे न।

<><><><><><>

Illegal-Mining

अवैध खनन कन्नै निब्वड़ने लेई ते एहूदे सरबन्धी नियमें दा उल्लंघन करने आहलें पर शिकंजा कसने लेई जम्मू जिले च पुलस नै अपने जतन होर बदाई लैते न। 2024 च बी अवैध खनन गी रोक लाने आस्तै जम्मू जिले च विशेष अभियान चलाए गे हे जिंदे च 933 गड्डियां जब्त कीतियां गेइयां हियां। इंदे च 831 गड्डियें गी नियम पालन पूरे करने मगरा छोड़ी दित्ता गेआ हा ते इस पूरे बरे च अवैध खनन सरबन्धी मामलें च इक करोड़ 31 लक्ख 57 जहार 312 रुपें दा जुर्माना इकट्ठा होआ। एहूदे अलावा जेड़ी गड्डियां घड़ी-घड़ी इनें मामलें च शामिल होआ रदियां हियां, उंदे खलाफ 4 एफआईआर दर्ज कीतियां गेइयां ते इंदे खलाफ कनूनी कार्यवाई बी कीती गेई। इस मौके पर बोलदे होई एसएसपी जम्मू जोगिंद्र सिंह होरें आखेआ ऐ जे जम्मू पुलस सार्वजनिक संपत्ति गी बचाने ते अवैध खनन गी रोक लाने आस्तै बचनबद्ध ऐ।

<><><><><><>

Orientation Programme

जम्मू-कश्मीर च नमें चुने गेदे विधायकें आस्तै 9 जनवरी थमां लेइयै 25 जनवरी 2025 तोड़ी जम्मू-कश्मीर विधानसभा दे सेंट्रल हाल च इक सिखलाई कार्यक्रम दा आयोजन कीता जा रदा ऐ। एहू कार्यक्रम संसदीय अनुसंधान ते प्रशिक्षण केंद्र लोकसभा सचिवालय नमीं दिल्ली कन्नै मिलियै करोआया जा'रदा ऐ। इस सिखलाई कार्यक्रम दा उद्घाटन जम्मू-कश्मीर दे मुख्यमंत्री उमर अब्दुल्ला होर करंगन ते एहूदी शुरूआत जम्मू-कश्मीर विधानसभा दे स्पीकर हुंदे स्वागती भाषण संबोधन कन्नै हाग।

<><><><><><>

Traffic Advisory

ट्रैफिक पुलिस जम्मू नै औंदी 5 जनवरी गी सिक्खें दे 10में गुरु श्री गुरु गोबिंद सिंह जी हुंदे प्रकाश पर्व दे सरबंध्यै च मनाए जाने आहले जश्न ते समारोहें दे महेनज़र शैह्ला च गड़िणं दी बवस्थित ढंगै सिर आओजाई मतल्लक दिशा-निर्देश जारी कीते न। प्रकाश पर्व दे महेनज़र शैह्ला च बक्ख-बक्ख थाहें आयोजित होने आहले धार्मिक कार्यक्रमें च खरी मती गिनतरी च श्रद्धालुएं दे शामिल होने दी मेद ऐ जेहदे चलदे सब्बनें प्रमुख गुरुद्वारें कश ट्रैफिक ते गड़िणं दी पार्किंग सरबंधी बंदोबस्त जकीनी बनाए जाडन। लोकें गी सलाहू दिती गेई ऐ जे ओहू 5 जनवरी गी जाम ज्नेई स्थिति कोला बचने आस्तै वैकल्पिक रस्तें दा इस्तेमाल करन।

<><><><><><>

IIA-Dogri

भारतीय वास्तुकर संस्थान दा जम्मू चप्टर परतियै ईमारती सम्यान दी नमैश यानि (BMC-25) लेइयै आया ऐ। एहू प्रदर्शन आई.आई.ए दी इयो जनेई 11मीं पैहलकदमी होग। इस नमैश च तकरीबन 70 स्टाल होंगन जिंदे च बक्ख-बक्ख किस्में दे समयानें दा प्रदर्शन कीता जाग। एह नमैश कल्लै थमां शुरू होइयै 6 जरवरी तोड़ी चलोग ते एहदे च सब्बनें आस्तै प्रवेश मुफ्त होग। आई.आई.ए दा जम्मू-कश्मीर चैप्टर इत्थे वास्तुशिल्प पेशे गी बढ़ावा देने आस्तै बड़ा गै योगदान देआ रदा ऐ।

<><><><><><>

USBRL Final Inspection

कश्मीर घाटी गी रेल राहें देसै दे होरनें हिस्सें कन्नै जोड़ने दे कम्मै गी सबूरा करने दे जतनें तैहत रेल सुरक्षा कमिशनर हुंदे आसेआ औंदी 7 ते 8 जनवरी गी उधमपुर-श्रीनगर-बारामूला रेल लिंक दे कटरा-रियासी सैक्शन दा खीरी निरीक्षण कीता जाहग। आकाशवाणी दे जम्मू संवाददाता दी रिपोर्ट मूजब, उत्तर रेलवे दे मुख्ब जन सम्पर्क अधिकारी हिमांशु शेखर उपाध्याय होरें दस्सेआ ऐ जे उत्तरी सर्कल दे रेल सुरक्षा कमिशनर होर मेद ऐ जे 15 जनवरी कोला पैहले साङ्के 16 किलोमीटर लम्मी कटरा-रियासी सैक्शन दा निरीक्षण करडन ते प्रधानमंत्री नरेन्द्र मोदी होर औंदी 6 जनवरी गी नमीं दिल्ली थमां जम्मू रेलवे डिवीजन दा वर्चुअल तरीके कन्नै उद्घाटन

करडन। जम्मू रेलवे डिवीजन दे उद्घाटन परैन्त रेल सुरक्षा कमिशनर होर 7 ते 8 जनवरी गी इस कटरा-रियासी सैक्शन दा खीरी निरीक्षण करडन। इस मौके पर रेलवे दे बड्डे अधिकारी बी उंदे कन्नै मजूद रौहडन। ध्यानजोग ऐ जे रेलवे आसेआ जम्मू-कश्मीर लेई इक नमीं वंदे भारत रेलगड्डी ते द'ऊं मेल ते एक्सप्रेस रेलगड्डियां मंजूर कीतीआं जा करदिआं न ते एहू रेलगड्डियां श्री माता वैष्णो देवी कटरा ते श्रीनगर रेलवे स्टेशन बश्कार चलडन ते इंदे रक्ख-रखाऽ दी जिम्मेदारी उत्तर रेलवे जोन दी होग। हासल जानकारी मूजब वंदे भारत ट्रेन कटरा थमां बड्डुलै 8 बज्जियै 10एं मिंटे पर चलोग ते दिनै 11 बज्जियै 20एं मिंटे पर श्रीनगर रेलवे स्टेशन पुज्जोग। इससै चाल्ली पैहली मेल ते एक्सप्रेस ट्रेन कटरा थमां बड्डुलै 9 बज्जियै 50 मिंटे पर चलोग ते दपैह्री 1 बजियै 10 मिंटे पर श्रीनगर रेलवे स्टेशन पुज्जी जाहग जिसलै के दुई मेल ते एक्सप्रेस ट्रेन कटरा थमां दपैह्री 3 बजे चलोग ते संज्ञां 6 बज्जियै 20एं मिंटे पर श्रीनगर रेलवे स्टेशन पुज्जा करोग।

<><><><><><>

Sports Awards

राश्ट्री खेड्ड पुरस्कारें दा अज्ज ऐलान करी दित्ता गेआ ऐ। विश्व शतरंज विजेता डी. गुकेश, पेरिस ओलंपिक च द'ऊं तगमे जित्ते आहली मनु भाकर, भारती हाकी टीम दे कप्तान हरमनप्रीत सिंह ते पेरिस पैरालंपिक्स च सुन्ने दा तगमा जित्ते आहले प्रवीण कुमार होरें'गी मेजर ध्यान चंद खेल रत्न पुरस्कार कन्नै नवाज़ेया जाहग। एहदे अलावा 32 खड्डारिएं गी अर्जुन पुरस्कार कन्नै सम्मानित कीता जाहग। इंदे च एथलीट ज्योथी याराजी ते अन्नू रानी, मुक्केबाज नीतू ते स्वीटी, शतरंज खड्डूरी वंतिका अग्रवाल, हाकी खड्डूरी सलीमा टेटे, अभिषेक, संजय, जर्मनप्रीत सिंह ते सुखजीत सिंह, पैरा-निशारेबाज राकेश कुमार, पैरा-एथलीट प्रीति पॉल, जीवनजी दिसि, अजीत सिंह ते सचिन खिलेरी शामिल ना। इंदे अलावा वरिष्ठ एथलीट सूचना सिंह ते पैरा-तैराक मुरलीकांत पेटकर होरें'गी अर्जुन अवार्ड लाईफटाईम कन्नै सम्मानित कीता जाहग।

<><><><><><>

Fencer Shreya

जम्मू-कश्मीर दी तलवारबाज श्रेया गुप्ता नै केरल दे कन्नूर च 35मीं सीनियर राश्ट्री तलवारबाजी प्रतियोगिता च कैहू दा तगमा जित्ति यै इक होर अहम उपलब्धि अपने नांऽ करी लैती ऐ। श्रेया नै जंदे रोज संपन्न होई दी इस पूरी प्रतियोगिता दरान बड़ा शानदार प्रदर्शन करदे होई कैहू दा तगमा हासल कीता। नॉकआउट मुकाबलें च श्रेया नै राजस्थान दी प्राकृति शर्मा ते गुजरात दी वंदिता बराड़ गी 15-6 कन्नै हराया। सेमीफाईनल च उंदा मुकाबला ओलंपिक खेड्डी चुकी दी भवानी देवी कन्नै होआ जेह्दे च श्रेया नै कड़ी टक्कर दित्ती पर ओहू 15-11 कन्नै एहू मुकाबला हारी गेइयां। एह्दे परैन्त श्रेया नै कैहू दे तगमे लेई खेड्हे गेदे मुकाबले च केरल दी जोस जोसना क्रिस्टी गी 15-9 कन्नै शिकस्त दित्ती। श्रेया गुप्ता अजें तगर 5 अंतर्राश्ट्री तगमे ते 20 राश्ट्री तगमे जित्ती चुकी दिआं न ते ओहू लगातार होरनें खड्डारिएं लेई प्रेरणा बनी दिआं न। जम्मू-कश्मीर खेड्ड काउंसल दी सचिव नुजहत गुल होरें जम्मू-कश्मीर ते पूरे राश्ट्र दा मान बधाने लेई तलवारबाज खड्डारन श्रेया गुप्ता ते उंदे कोच शोटू लाल शर्मा हुंदी सराहना कीती ऐ।

<><><><><><>

Trains Delayed

उत्तर भारत दे मते सारे हिस्सें च धनी धुंध ते कोहरे करी केई रेलगड्डिएं दी आओजाई पर माड़ा असर पवै करदा ऐ। भारती रेलवे मूजब, दिल्ली जाने आहली घटोघट्ट 43 रेलगड्डियां अपने तय समें कोला 5 घैंटें चिरें चलै करदिआं न। जात्तरिएं गी सलाहू दित्ती गेई ऐ जे ओहू रेल राहें सफर करने लेई घरें शा निकलने कोला पैहले रेलगड्डिएं दे समें बारै ताजा-तरीन जानकारी हासल करी लैन तांजे उनें'गी कुसै किस्मै दी कोई परेशानी नेई झल्लनी पवै।

<><><><><><>